

欽
定
全
唐
文

欽定全唐文卷三十六目錄

新文藝出版社藏書

元宗 十七

命祭郊廟社稷嶽瀆勅

定京畿職田勅

令天下諸觀轉本際經勅

冀州獻李嘉寵勅

賜張九齡勅

追贈鄔元崇勅

褒賜韋堅等勅

欽定全唐文

卷三十六

目錄

加莊文列庚桑四子爲真人勅

禁地租外徵桑課勅

賜朝集使勅

賜朝集使勅

致祭關內名山大川勅

以冬至次日受朝勅

均平戶籍勅

迎李含光勅

命李含光建茅山壇宇勅

置茅山修葺戶勅

答李含光進紫陽觀圖勅

命諸道賀正表隨京官元日同進勅

賜李含光號元靜先生勅

答李含光謝賜法號勅

答李含光進靈芝勅

答李含光賀仙藥靈芝勅

命李含光投謝茅山勅

賜李含光養疾勅

答李含光謝賜詩及物勅

命李含光奉詞詣壇陳謝勅

遣使祭嶽瀆勅

停親鄰代輸租庸勅

禁採訪使兼理郡縣勅

放舉人並下第勅

答李含光謝賜詩勅

賜李含光物及香棗等勅

答李含光謝修齋醮勅

褒賜李含光勅

長至日賜李含光勅

賜李含光物勅

命李含光修功德勅

禁茅山採捕漁獵勅

令所司收換惡錢勅

戒縣令勅

賽祭畿內名山勅

聽國子監諸生還鄉習讀勅

序定朝儀勅

曲宥蘇良嗣勅

賜徐堅勅

加襄樂縣主等實封勅

賜司馬承禎勅

賜丹陽太守林洋等勅

欽定全唐文卷三十六

元宗 十七

命祭郊廟社稷嶽瀆勅

感而遂通神之鑒也祈而必報禮之經也今農已畢功歲則大稔京坻之積寰海攸同用陳蠲潔之薦以答明禋之祉宜令侍中牛仙客等分祭郊廟社稷嶽瀆等其四海四鎮及名山嶽瀆使有道路由過者亦宜便祭

定京畿職田勅

京畿地狹人戶殷繁計丁給田尚猶不足兼充百官苗子

固難周濟其諸司官令分在都者宜令所司具作定額計
應受職田並於都畿給付其應退地委採訪使與本州長
官給貧下百姓其應給職田亦委採訪使與所縣長官勘
會同給仍永爲常式

令天下諸觀轉本際經勅

朕每念黎庶無忘餐寐冀其家給人足富而且壽宏濟之
方莫如道教大聖垂範微言粲然遵而行之其應何速況
時將獻歲萬物發生旣協陽和或存惠養宜令天下諸觀
起來年正月一日至年終已來常轉本際經其四大齋日

每百官齋之日常令講誦庶澤及無外稱朕意焉

冀州獻李嘉寵勅

李嘉寵土風所育體幹出羣因其器用之宜俾在人門之次可武衛長上仍配左監門衛番上

賜張九齡勅

贈太師光庭嘗爲重任能徇忠節忽隨化往空存遺事其子屢陳誠到請朕作碑機務之繁是則未暇朝廷詞伯故以屬卿彼之行能卿之述作宛其鴻裁因茲不朽耳

追贈鄔元崇勅

洪州人鄔元崇往在文明年中傳元元皇帝真誥於天后
曰我國祚無窮當千萬君遂遭禁錮因茲淪喪自非忠義
之士感激過人孰能不避死亡之誅竟達神靈之命宜與
追贈以慰泉壤其子瓊亦依資授一官

褒賜韋堅等勅

古之善政者貴於足食欲求富國者必先利人朕思關輔
之間尤資殷贍比來轉輸未免艱辛故置此潭以通漕運
萬代之利一朝而成將允叶於永圖豈苟求於縱觀其陝
郡太守韋堅始終檢校夙夜勤勞賞以懋功則惟常典宜

特與三品仍改授一子三品京官兼太守判官等並即量
與改轉其專知檢校始末不離潭所者並孔目官及至典
選日優與處分仍委韋堅具名錄奏應役人夫等雖各酬
庸直終使役日多並放今年地稅且啟鑿功畢舟楫已通
既涉遠途又能先至永言勸勵稍宜甄獎其押運綱各賜
一中上考準前錄奏船夫等宜共賜錢二千貫以充宴樂
加莊文列庚桑四子爲真人勅

昊穹眷命烈祖降靈休昭之儀存乎祀典莊子文子列子
庚桑子列在真仙體茲虛白師元元之聖教洪大道於人

寰觀其微言究極精義比夫諸子諒絕等夷其莊子依號
曰南華真人文子號曰通元真人列子號曰沖虛真人庚
桑子號曰洞靈真人其四子所著改爲真經崇元學置博
士助教各一員學生一百人

禁地租外徵桑課勅

如聞河東河北官人職田旣納地租仍收桑課田樹兼稅
人何以堪自今已後官人及公廨職田有桑一切不得更
徵私課

賜朝集使勅

今之牧守古之諸侯撫育黎元歲有朝會蓋問之疾苦審以安危必在適時期於不擾洎告辭處分師古前規如聞遙自朝廷初到郡縣便遠追僧道廣說滋彰山谷往還日夜疲弊通賢當無此事俗吏誠恐有之朕夙夜在心期之清淨頃聞此說深疚乃懷宜覺前非俾無後悔當道採訪固不得違寮友之間遽相戒勵宜知朕意各守章程並宜好去

賜朝集使勅

古者諸侯歲時朝覲將以陳其政理用申考績今卿等受

委親民遠來會計經途冒涉曾並安好朕每憂勤念茲黎
庶憫其徭役未息流寓莫歸是以當宁興嘆中宵忘寢永
言共理實冀分憂凡有百姓及鰥寡孤獨並乏絕之戶征
鎮之家凡可矜恤卿等此來若何爲養今年稼穡大率少
似不豐閭閻之間有貯積否至於百姓閒事朕欲委曲盡
聞卿等遠來疲勞卒難備對且聽尋親知續當序進以問
風化

致祭關內名山大川勅

敬惟明神普存於祀典咸秩羣望式重於邦畿頃者分命

使臣致誠嶽瀆山川便近亦已有處分其關輔之內屢有
陳祈王者所都禮亦異數應關內名山大川各委所繇郡
長官稍優於常禮致祭於京兆府界宜委蕭炤同與少尹
分祭倍崇精潔以副誠祈

以冬至次日受朝勅

王者父事天母事地所以昭孝敬之道通神祇之德朕虔
奉明命備稽大猷實在緣情不惟相襲伏以昊天上帝義
在尊嚴恭惟祀典每用冬至既於是日有事於圓丘更受
朝賀實深兢惕自今以後冬至宜以次日受朝仍永爲恒

式

均平戶籍勅

朕聽政之餘精思理本意有所得庶益於人且什一而稅
前王令典農桑異宜舊制猶闕今欲審其戶等拯貧乏之
人賦彼商賈抑浮惰之業優劣之際有深察之明閭里之
閒無不均之歎頃以人不欲擾法貴從寬所以比來未全
定戶今已經數載產業或成適可因茲平於賦稅自今已
後每至定戶之時宜委縣令與鄉村對定審於衆議察以
資財不得容有愛憎以爲高下徇其虛妄令不均平使每

等之中皆稱允當仍委太守詳覆如有不平縣令錄奏量
事貶降其鄉村對定之人便與節級科罪覆定之後明立
簿書每有差科先從高等務茲不足庶叶彝倫

迎李含光勅

尊師道德之重仙真所欽是以修齋必有精感況山惟地
肺會司命之福庭壇邇天宮則真人之舊館演弟子勤志
致蒼生壽域迢遙東望日夕傾心至於開春佇迴風馭以
慰渴賢之想來敷元妙之教也初秋尚熱尊師平安好遣
書指不多及

命李含光建茅山壇宇勅

鍊師李含光道高紫府學總黃庭賁然來思式敷至妙既而屬念茅嶺言訪真經近出咸秦遠遊方外朕載懷仙境延佇勤修將使九有之人同歸元教三清之衆俯鑒遵行豈徒夢寐華胥馳誠碧落而已想尊師建立真儀所修壇宇初至經構殊用勞心甚寒得平安好遣書指不多及

置茅山修葺戶勅

眷言仙府旁連洞宮青壇舊居緬想靈迹紫臺新宇煥啟真宗式彰崇奉之誠爰置修葺之戶尊師等副朕茲意清

靜寶持也

答李含光進紫陽觀圖勅

昨程元暹至得所進圖具規矩矣然崇飭仙觀祈望真遊若不幽邃清閒豈降霓裳羽蓋且在科儀猶有差降至於仙真道衆故亦不可同居所置紫陽觀大院内更不須著人居止但作虛廊四合清潔殿堂以修香火用候雲駕其道衆等別院安置今具圖往應所添加亦入支科矣尊師體真遠識含和內融必能上合靈仙之心下副欽崇之意也甚寒得平安好遣書指不多及

命諸道賀正表隨京官元日同進勅

承前諸道差使賀正十二月早到或有先見或有不見其所賀正表但送省司又不同進因循日久於禮全乖自今已後應賀正使並取元日隨京官例序立便見通事舍人奏知其表直送四方館元日仗下後一時同進

賜李含光號元靜先生勅

道者是萬有之宗法者是九真之契大聖以垂教後學以進修弟子比欲敬受經法以未詳嚴秘又真經散逸純謬處多近訪得天真遺蹟至於科儀無不條備加以募寫一

依戒旨喜夙志之見遂荷真靈之降恩以今月十八日仰
啟三清尊君太師元師真師潔齋受訖載捧真文恭披鳳
篆將以運心太虛之境以養谷神之壽也其跪信具依經
傳造足今並投詞封以附往尊師體道之要含光之和清
簡無爲與予合志請爲弟子以前件詞及跪信投茅山華
陽洞天金壇靈府以爲明信用證勤精夫有德者尊以美
號則葛洪著抱朴之稱陶君有貞白之名永言前修事實
不遠今號尊師爲元靜先生以昭懿德彰高行也故令使
往甚暄尊師平安好遣書指不多及

答李含光謝賜法號勅

尊師秉德之和探道之要爲弟子親藏脆信以啟靈真且加號以表精修衣服者所以展誠敬是申崇尚之意式贊仙階之美也所謝知

答李含光進靈芝勅

靈芝者和氣以生真仙鑒植昔軒轅至道三秀屢芳永惟貞符載瑞茲日黃輝朱采八十一莖色叶金方數應陽吉或連跗並萼或雙本同枝出天洞以敷榮就藥壇而結秀實曠代嘉貺至感殊祥尊師旣陳詞達誠遠致真錫弟子

敬受元吉當服餌焉甚熱平安好

答李含光賀仙藥靈芝勅

爐開仙藥九真示傳院合靈芝三茅鑒植徵之元錄蓋未
曾聞唯魏伯陽豫兆於前今李越成効之於此朕當齋心
以伺專使往迎與尊師同承道錫也所賀知

命李含光投謝茅山勅

尊師所奏靈芝信殊祥也若彩雲繁布比芳蘭芬馥當紫
陽之福地叶丹誠之吉徵遠與大同玉芝遙爲合應斯仙
真上祐尊師潔誠是降休徵用深慶慰今令將詞及香投

謝天洞式憑高德以達虔心也

賜李含光養疾勅

朕每重清真親乎有道而覽茲誠請義在難違俾遂廼懷
以就醫藥亦旣痊損當早來旋

答李含光謝賜詩及物勅

尊師抱一守中探微昭遠能回真潔發揮道門遂與太和
先生啟是仙宗起予虔奉崇飭靈迹廣求真經則詩以寵
行物將厚意永慰岐路以彰禮賢也所謝知

命李含光奉詞詣壇陳謝勅

尊師遠訪名山精求至教建立壇宇載寫真經庶事用心
殊勞倦也朕志求道要緬想真仙將憑潔誠以修元妙今
以十八日清齋潔壇以受經誥靈仙降祐祈有證明今將
詞及香信等往尊師當爲宣揚科儀奉詞陳謝庶上達仙
宮下垂昭應甚暄尊師得平安好遣書指不多及

遣使祭嶽瀆勅

朕祇肅羣祀祈在三農冀幽贊之有憑必昭報而無闕宜
令工部尚書郭虛己等分祭五嶽四瀆

停親鄰代輸租庸勅

朕永念黎元務宏愛育所以惠政頻及善貸相仍亦將克致和平登於仁壽如聞流庸之輩漸亦歸復浮食未還其數非廣靜言此色並見其繇蓋爲宰牧等授任親人職在安戢稍有逃逸恥言減耗籍帳之間虛存戶口調賦之際旁見親鄰此弊因循其事遂久寤寐興念良用憮然不有釐革孰致殷阜其承前所有虛掛丁戶應徵租庸課稅令近親鄰保代輸者宜一切並停應令除削各委本道採訪使與外州相知審細簡覆申牒所繇分其逃還復業者務令優恤使得安存縱先爲代輸租庸不在酬還之限

禁採訪使兼理郡縣勅

本置採訪使令舉天下大綱若大小必由是一人兼理數郡自今已後採訪使考察善惡舉其大綱自餘郡縣所有奏請並委郡守不須干及

放舉人並下第勅

朕祇膺寶厯殷鑒遠圖慮草澤之遺賢降弓旌於屢辟是以三紀於茲羣材輻輳或一言可紀必適輪轅一善有經每加獎進庶六合之內靡然同風四科之門咸能一貫何茲意之緬邈而增修之寂寥今者舉人深乖宿望朕之所

問必正經史卿等所達成皆少通所問多否以獨鑒未周
必資僉議爰命朝賢三事精加詳擇咸以爲闕於聚學莫
可登科至於每歲秀才有司考試帖經問策兼以雜文假
如及第在階選序今之將舉待以榮班各非異才孰可超
獎墜鑿經傳且未精勤俯拾青紫豈宜倖覲其懷才抱器
舉人並放更習學即好去其有不對策羅嘉茂既是白丁
宜於劔南効力全不答所問崔慎惑劉灣等勒爲本郡充
學生之數勿許東西其所舉官各量貶殿以示懲誡

答李含光謝賜詩勅

尊師以道樞宏濟以真宗啟迪來致元妙去還雲山詩以見懷用彰惜別也所謝知

賜李含光物及香棗等勅

敬問元靜先生先生稟潔白之節得黃中通理學徧九流逾守元默心遊八景益混光塵則密行高節良可歎矣然能屈獨往之心廣宏濟之道緬迪真祐深啟淳源知前後所修功德皆有感應瞻望東南馳心日夕今附物及香棗等尊師更爲九度修功德也庶使蒼生承日用之福外化有歸順之心天下和平惟道所庇修功德了當暫迂風馭

一至京來甚寒尊師比清暢唐師回遣書指不多及

答李含光謝修齋醮勅

齋醮之儀顧有模楷將致誠懇必仗精修故屈尊師敬申
妙旨知已事畢良多愧也所謝知

褒賜李含光勅

尊師思慮熟精虔心齋潔致福利物其功實多況擇高流
同勤至道精修不怠嘉尚彌深香信之資用昭誠意也

長至日賜李含光勅

尊師以至道妙用精誠感真薦福朕躬居寧寰宇俯及長

至來慶休祥履端之吉是與同也遲至來春當共尊師相見

賜李含光物勅

尊師上清真修下宏仙教爲朕致福以庇蒼生三皇祕文已承嘉應河圖內記祈延福祥虔誠之心遙屬茅嶺所寄少物豈答勤勞春景漸和尊師比加宜也

命李含光修功德勅

敬問元靜先生昨弟子唐若倩至具知去月十一日功德事畢夫以至誠之心精修之感壇在仙境宜按沖科下庇

蒼生上資宗社永求福應元感昭然及知天地至和人神
胥慶以降甘露以表休符則視履考祥其旋元吉今歲聿
云暮璿璣運行不愧再勞事緣萬姓今附香信往至年下
且請尊師於所居修功德以助履新至來載春和復請尊
師於茅山上爲宗社下爲黎元修河圖大齋應緣功德之
物觸新再造無以多勞所利者廣又道德相親氣味縣合
諸山聖迹多有異人若有尋訪尊師當爲弟子招致也甚
寒尊師道體安和唐若倩還遣書指不多及

禁茅山採捕漁獵勅

勅江南東道採訪處置使晉陵郡太守董琬山嶽上䟽分野下鎮方隅降福祐於人施雲雨之惠且茅山神秀華陽洞天法教之所源羣仙之所宅固望秩之禮雖有典常而崇敬之心宜增精潔自今已後茅山中令斷採捕及漁獵四遠百姓有喫葷血者不須令入如有事式申祈禱當以香藥珍羞亦不得以牲牢等物卿與所由存心檢校漸寒卿得平安好

令所司收換惡錢勅

錢貨之用所以通有無輕重之權所以禁踰越故周立九

府之法漢備三官之制永言適便必在從宜如聞京師行
用之錢頗多濫惡所資懲革絕其訛謬然安人在於存養
化俗期於變通法若從寬事堪持久宜令所司即出錢三
數十萬貫分於兩市百姓間應交易所用錢不堪久行用
者官爲換取仍限一月日內使盡庶單貧無患商旅必通
其過限輒違犯者一事已上並作條件處分

戒縣令勅

唐虞分理命以子男周漢建官委以令宰朕稽古前哲寤
寐全才委之銓衡慎擇銅墨至於上敷朝政下字淳人親

其農桑均其力役使惇嫠者視之猶父母俾匱乏者賴之以安全然後入使類能六條舉最擢以含香粉署獎以秋簡霜臺是乃立身效官移忠入仕榮家報國豈不美歟若徇己冒私擾人敗政有懷潤屋無懼害公豈惟刑網貽憂抑亦名節隳替蓋士君子之所恥亦名教之罪人鴻漸於磐豈不勉哉今卿等將欲赴官朕之所言提撕之耳所謂聽訟吾猶人也必也使無訟乎況今之人也與古人不殊今之官也與古官無別穀璧銅印其猶昔榮而卓茂魯恭迥然無繼將勸獎之道不至豈淳樸之風未還撫事君臨

載深厲惕今者庶乎卿等能副此心賞旣超倫刑必當罪
各宜勉勵敷我皇猷無謂天高四聰必達並即於朝堂賜
食食訖好去

賽祭畿內名山勅

頃緣少雨遍於致祭旋降甘澤實荷靈祇其先令中使祭
者別有昭報京兆府比來應有祈請處並畿內名山靈迹
並令府縣長官各申賽祭

聽國子監諸生還鄉習讀勅

國子監諸生等旣非舉時又屬暑月在於館學恐漸炎蒸

其有欲歸私第及還鄉貫習讀者並聽仍委本司長官具名申牒所由任至舉時赴監東京監亦準此

序定朝儀勅

九族既睦百官有序至於班列宜當分位嗣王實先於主祭國老有貴於乞言比在朝儀尚爲間雜非所謂睦親敦舊之義也嗣王宜與開府儀同三司等致仕官各居本品之上用爲永式

曲宥蘇良嗣勅

蘇良嗣往者頻被言告指驗非虛朕以其年迫桑榆情敦

簪履掩其惡迹竟不發揚洎乎歸壤之辰爰備飾終之禮
不謂因子重發逆蹤所司執法論科請申毀柩之罰朕念
勞志切惟舊情深是矜因赦之科特降非常之霈式延恩
於朽骼俾流渥於幽魂特免斲棺之刑寬其籍沒之典

賜徐堅勅

得所進詩甚有佳妙風雅之道斯焉可觀並據才能略爲
贊述具如別紙宜各領之

加襄樂縣主等實封勅

故惠宣太子女襄樂縣主等德稟賢王名高淑女資其婉

順邁此偏孤念遠之德惟恩是屬宜受賜於湯沐俾承榮
於敦敘可各賜實封一百戶

賜司馬承禎勅

司馬鍊師以吐納餘暇琴書自娛瀟灑白雲超馳元圃高
德可重慙違蘿薜之情雅志難留敬順松喬之意音塵一
閒俄歸葛氏之天台道術斯成頃縮長房之地脉善自珍
愛以保童顏志之所之略陳鄙什旣敘前離之意仍懷別
後之資故遣此書指不多及

賜丹陽太守林洋等勅

勅丹陽郡太守林洋及道俗父老百姓等朕遠遵元妙載
想靈仙眷茲茅山是爲天洞瑤壇舊觀餘址尚存道要眞
經散落將盡永言法寶良用憮然今爲黎元大崇道本故
令清修之士建立眞儀訪迹靈山以新觀宇庶使元宗再
闡瞻奉知歸降福寰瀛致之仁壽也又比年以來每遵清
淨官吏有修良之美農桑屬豐稔之期百姓之間庶無乏
絕也微寒卿及道俗父老百姓等平安好遣書指不多及

欽定全唐文卷三十七目錄

元宗 十八

答張說謝賜碑額表批

答張九齡進白羽扇賦批

答張九齡讓起復中書侍郎同平章事批

答張九齡以薛王有疾憂變容髮請宣付史館批

答張九齡以薛王薨損饌請復膳批

答張九齡請施行御註道德經批

答張九齡請東北將吏刊石紀功德批

金史卷一百一十一
答張九齡請御註經內外傳授批

答張九齡請西幸改期宣付史館批

答張九齡請爲寧王寫經宣付史館批

答張九齡賀康待賓克捷批

答張九齡賀北庭解圍仍有殺獲批

答張九齡賀奚契丹離貳廓清有期批

答張九齡賀誅契丹賊可突干批

答張九齡賀破突厥批

答張九齡賀東北累捷批

答張九齡賀依所料赤山北無賊及突厥要重人

死批

答張九齡賀蓋嘉運破賊批

答張九齡賀賊魯蘇遁走批

答張九齡賀雪批

答張九齡賀侍講徧賜衣物批

答張九齡賀雨批

答張九齡賀雨晴批

答張九齡賀雨批

答張九齡賀雪批

答張九齡賀祈雨有應批

答張九齡賀太陽不虧批

答張九齡賀祥雲見批

答張九齡賀麥登批

答張九齡賀御製開元文字音義批

答張九齡賀論三教批

答張九齡賀御註金剛經批

答張九齡賀皇太子製碑批

答張九齡賀上仙公主靈應批

答張九齡賀昭陵徵應批

答張九齡謝加章紱批

答張九齡謝工部侍郎集賢院學士批

答張九齡謝知制誥批

答張九齡謝兩弟移官就養批

答張九齡謝中書侍郎批

答張九齡謝賜麥麵批

答張九齡謝賜藥批

答張九齡謝賜尺詩批

答張九齡謝太子書頌批

答張九齡謝兩弟授官批

答張九齡謝賜衣物批

答張九齡觀御製喜雪篇陳誠狀批

答張九齡謝賜御書喜雪篇批

答張九齡讓賜宅批

答張九齡讓弟起復授官批

答張九齡謝起祥除批

答張九齡進龍池聖德頌批

答張九齡謝弟授官批

答吳筠進元綱論批

答司馬承禎進鑄含象鏡劒圖批

答葉法善乞歸鄉表批

答吳道子進畫鍾馗批

答濮陽郡王等請改修龍池聖德頌表批

答蕭嵩請移家廟疏批

答侍中裴光庭等上尊號表批

答再請上尊號表批

答三請上尊號表批

答李齊古石臺孝經表批

答顏真卿賀皇帝即位批

營興慶宮德音

欽定全唐文卷三十七

元宗 十八

答張說謝賜碑額表批

朕禮賢之志恨不同時旌善之懷何隔今古卿業崇啟迪
功濟艱難盡人臣之忠節成天下之美事方接婚姻之禮
長榮帶礪之族潤葉流根不足多謝

答張九齡進白羽扇賦批

朕頃賜扇聊以滌暑卿立賦之且見情素詞高理妙朕詳
之久矣然佳彼勁翮方資利用與夫棄捐篋笥義不當也

金史卷一百一十一
答張九齡讓起復中書侍郎同平章事批

卿去歲禮闈擢授樞密實關政本將倚爲相頃來升用是會宿心雖屬家艱已踰年序不有至孝誰能盡忠若墨纓之義不行蒼生之望安在謂此情難奪豈成命可移比日行在佇卿促轡今既至止無勞固辭朕以非常用賢曷云常禮哀訴即宜斷表今日便上

答張九齡以薛王有疾憂變容髮請宣付史館批
凡曰兄弟豈同他人況有疾疹自成憂迫不辭容髮致改且喜神心助人雖用靈方猶未痊平顧茲德薄實懷多慮

所請宣示良或未然

答張九齡以薛王薨損膳請復膳批

兄弟之喪人倫所重哀廢飲食禮訓有變雖欲自抑有如此情

答張九齡請施行御註道德經批

先聖說經激時立教文理一貫悟之不遠後來注解歧路增多既失本真動生疑誤朕恭承餘烈思有發明推校諸家因之詳釋庶童蒙是訓亦委曲其詞慮有未周故遍示積學竟無損益便請宣行朕之不才甘失旨於先帝卿等

虛美豈不畏於後生循環此情未知所適可廣示朝廷有能正朕之失者具爲條件錄姓名以聞當別加重賞

答張九齡請東北將士刊石紀功德批

事有難易因圖可否小蕃背誕惡貫已盈人神弃之指期可滅今之尅定偶會夙心記以史官銘之樂石頗矜功伐不願爲之伯獻前請朕已不納卿等苦論載用多媿使桓山之頌復在茲乎

答張九齡請御註經內外傳授批

此經宗旨先離諸相解說者衆證以真空僧徒固請欲以

宏教心有所得輒復疏之今請頒行慮無所益

答張九齡請西幸改期宣付史館批

初聞三輔之間今歲善熟朕緣陵寢誠欲西行然積虛累
年乍得小稔即又聚食所慮重難倘夏麥不登未免匱乏
百姓不足朕孰與安所以再三疚懷欲去不忍至於宮苑
所樂氣候非宜苟得人安終不以此爲念卿可宣前旨更
俟後期所請遍示朝列及宣付史館亦屬煩也任卿等自
商量

答張九齡請爲寧王寫經宣付史館批

道由先宗欽承餘慶所祈福力憑以真經歸謹至誠匪存名教所請者依

答張九齡賀康待賓克捷批

狂賊遠來無能支久果自奔北不擾邊人豈朕獨見之明固在大臣良算所請宣付史館者依

答張九齡賀北庭解圍仍有殺獲批

醜虜違方我之有待奔亡相次天實誅之鎮撫四夷故有賢相權宜一策何獨朕躬所賀知

答張九齡賀奚契丹離貳廓清有期批

比未窮巢穴有慎佳兵果自猜攜人神所弃折衝樽俎遙可圖之所賀知

答張九齡賀誅契丹賊可突干批

用兵之上者修政於廟堂折衝千里之外此之謂也小寇適降復爲翻動邊軍除翦有國常刑朕方事藉田而今獻捷當鑄劒戟以爲農器也

答張九齡賀破突厥批

兩蕃歸我因用御邊北虜猖狂欲有親率何則馳騁之騎突厥頗強弓矢之功契丹稱勁彼強也歷遠已弊此勁也

襲近而摧勢自不敵況違天意廟堂良算亭障稜威故合而有成豈朕之獨斷所賀知

答張九齡賀東北屢捷批

東歸兩蕃不孤含育北制強虜且知威信自相攻伐稍警邊陲屢有奔亡非無逆順朕之早預故亦常圖今乃歸功得無同體

答張九齡賀依所料赤山北無賊及突厥要重人

死批

朕臨御有年更事多矣天人之際先意後合此亦賊意可

量非朕謀之必中將有可紀任付史館

答張九齡賀蓋嘉運破賊批

方隅暫警乃圖其事不出意外且有殺傷雖復嘯聚邊城
固應知難而退鼎臣參佐何獨朕躬所賀知

答張九齡賀賊魯蘇遁走批

朕以信撫遠蕃故當順以歸命去順爲惡天何容之力屈
計窮果自奔散卿等料其後事亦以當然所賀知

答張九齡賀雪批

藉田勸農勞酒成禮此時降雪神人以和是賴台臣致茲

金史卷之三十一
嘉應

答張九齡賀侍講徧賜衣物批

漢家用儒倚以爲相卿等輔佐朕亦論思侍講說詩用符正道旣至匡益特加章綬是先敦獎應會謀猷因斯行諸引進經術也所賀知

答張九齡賀雨批

過月不雨農事或讐是用責躬兼令省獄卿即同體共達乃誠天且不違穀麥皆遂若事關政令動必合符積久冤抑亦宜踈理宜成朕懷也所賀知

答張九齡賀雨晴批

雨以救旱忽致秋霖所慮害農彌深罪已明靈盱嚮遂與
開霽實因誠至非謂德先時麥旣登百穀有望亦卿等同
體之效所賀知

答張九齡賀雨批

時愆膏雨至於節日以此之故初無宴私雖遵所請憂樂
相半樂同和氣憂亦爲陰因茲霈然若以誠應方收晚歲
有同再熟與卿同慰也

答張九齡賀雪批

歲律方窮久無雨雪頃者信宿落而復收朕用責躬天實降鑒皓然竟夕將遍寰瀛固在卿等寬和所致也

答張九齡賀祈雨有應批

朕每念元元無忘夙夜頃來少雨是用精祈所見徵祥果成其應豈朕之德天實爲之今則滂沱與卿等同慰請付史館者依

答張九齡賀太陽不虧批

一昨有司奏太陽當虧孰云交分亦繫休咎朕之薄德是用責躬應蝕不蝕且符至願昔漢家日蝕之變則舉賢良

招直諫蓋思補過以答其咎也曷若勤於未兆預以圖之
招諫登賢以先天意當與卿等夙夜爲心所請付史館者
依

答張九齡賀祥雲見批

朕欽藉元風緬懷道力上資宗廟下浸元元俾在潛通乃
至昭覩愧畏相屬曷用當之願記史臣以彰降鑒豈朕所
宜讓也所請者依

答張九齡賀麥登批

朕親耕千畝卿等佐之謂之勤農期於盡力故園苑種麥

別殿築場訓子勸人因之表奏臻盛薦寢是契夙心雲日
告休易致昭感欲書諸史策卿實史官任斟酌事宜耳

答張九齡賀御製開元文字音義批

象物成文以行代教傳習寢遠疑誤增多不制其失孰云
端本稍變條流因之指授且以相示竟無可否豈用茲小
學而歸美乎餘依所請

答張九齡賀論三教批

頃因節日會以萬方略舉三教未暇盡理復茲一集求之
精義不許游詞用服其心以懲習俗況會三歸一初分漸

頓理皆共貫使自求之卿等論道廟堂化源何遠事關風教任付史館

答張九齡賀御註金剛經批

不壞之法真常之性實在此經衆爲難說且用稽合同異
疏決源流朕位在國王遠有傳法竟依羣請以道元元與
夫孝經道經三教無闕豈茲祕藏能有探詳所賀知

答張九齡賀皇太子製碑批

兒子等服勤師訓匪曰才能初爲此文次令繕寫卿在左
右因以呈示曾不箴規乃致推美將簡朝列得無愧乎

答張九齡賀上仙公主靈應批

道有默仙謂之形解古來旣爾今亦將然童幼之年傷其
天促靈變之理乃入元真且與方外爲心不比人間結念
所請書諸國史以襲元元卿亦史官任爲凡例兼請宣示
者並依

答張九齡賀昭陵徵應批

先帝應期道光文武之業亦旣弃代人畏軒轅之臺忝以
丕承罔不夙夜每有啟悟形於動靜豈茲狂悖勞我神兵
保佑實深戴賀增惕古之靈應未之前聞所請宣付史官

并示朝列固其宜也並依

答張九齡謝加章紱批

卿早踐中書後牧邊郡因加此紱義在優賢今特賜卿猶前命也所謝知

答張九齡謝工部侍郎集賢院學士批

卿學府高標士林貞幹論思之地亦旣優閒彌綸之司聊從應務別當獎擢何乃謙撫所謝知

答張九齡謝知制誥批

昔掌王言以宣國命頃來相習多事游詞卿舊在掖垣已

推才識及登書府備探微奧故有新命宜副朕心何所謙抑誰與宣誠

答張九齡謝兩弟移官就養批

卿之忠誠本於孝行亦旣許國每懷安親爰請二弟近鄉就養申之孝友遞爲隱犯用嘉此請故遂雅懷所謝知

答張九齡謝中書侍郎批

此職掄才十年虛位以卿達識所以酬庸斟酌朝經動關政本當茲密命宜喻朕懷所謝知

答張九齡謝賜麥麵批

歲比不登朕每勤止宮中間處粟麥兼滋常候嘉苗以近
知遠亦旣成熟實用慰心所以躬率諸子是芟是刈稼穡
艱難取知爲國之本宗廟致敬實謂思於所先旣以薦新
餘用分錫卿等同體固合共之所請宣付史館任量其宜
也

答張九齡謝賜藥批

臘日所惠固其常耳信則微物亦有嘉名與卿共之何足
爲謝

答張九齡謝賜尺詩批

尺之爲數陰陽象之宰臣匠物有以似之卿等謀猷非無法度因之比興以喻乃心盡力鈞衡深知雅意

答張九齡謝太子書頌批

大臣作頌以揚休聲銘之琬玉亦資翰墨太子鴻書則非工身爲國本將示於後因以命之無能發揮何所爲謝

答張九齡謝兩弟授官批

卿之昆弟並著才能去歲所諭已有處分旣終祥縞宜列朝衣豈謂殊私雅符公議所謝知

答張九齡謝賜衣物批

藉卿政事頃在縉纓今禮制已過服用茲始少許衣物何足謝焉

答張九齡觀御製喜雪篇陳誠狀批

復緣講讀便與希烈未得付卿今過有稱揚豈成獻替所期勩力保合太和今付一本觀唱和之美也

答張九齡謝賜御書喜雪篇批

比年少雪遂罕秋成恐陰律愆期時無可望孰云禱久每事虔誠雨雪驟盈喜慰初集率爾成作書情而已方示朝廷

答張九齡讓賜宅批

比來官宅隨事借人與卿寧居用加修飾已有處分不煩讓也欲令師儉雖則卿心縱使增修其如國命況聞制度不是宏博大臣所處亦以爲宜可擇日移入

答張九齡讓弟起復授官批

卿移孝於忠自家刑國誠有必盡義實可嘉人之同氣莫不相似念卿才識弟亦可知朕欲登賢俱在朝列而尚居哀紀願留主祭可以理奪用允所求待至縞祥非無後命

答張九齡謝起祥除批

不可復見惟餘孝思情禮所歸遠近無別卿當大任朝夕謀猷欲遂乃懷其如重寄旣從奪禮安得顧私宜抑此情也

答張九齡進龍池聖德頌批

天啟元符以贊鴻業朕誠薄德曷用當之旣史冊是書而頌聲復起宗子固請遂及於茲卿之詞旨度越前輩曲成意義多所發揮實靈命之克彰因斯文之不朽

答張九齡謝弟授官批

朕之知卿非在今日君臣之際何有閒言故在增榮有以

昭亮況卿令弟尚淪卑秩以公見授何謂私恩所謝知

答吳筠進元綱論批

尊師跡參洞府心契沖冥故能詞省旨奧義博文精足以
宏闡格言發明幽致朕恭承祖業式播元風覽此真筌深
符夢想豈惟披翫無斁將以啟迪虛懷其所進之文用列
於篇籍也

答司馬承禎進鑄含象鏡劔圖批

得所進明照寶劔等含雨曜之暉稟八卦之象足使光延
仁壽影滅豐城佩服多情慚式四韻

答葉法善乞歸鄉表批

省表具知師羽儀碧落梁棟元門迹雖繫於人間神自超
於物累方欲受三清之要宣六氣之和資於朕躬助以爲
政且光慶之義衆妙所存江海之心此期難允即宜斷表
深體朕懷

答吳道子進畫鍾馗批

靈祇應夢厥疾全瘳烈士除妖實須稱獎因圖異狀須顯
有司歲暮驅除可宜徧識以祛邪魅兼靜妖氛仍告天下
悉令知委

答濮陽郡王等請改修龍池聖德頌表批

夫頌者美盛德之形容每省朕躬曷稱奇紀歲月斯積符瑞屢臻欲備敘之復茲誠請實賴人事不遺神明允來意也

答蕭嵩請移家廟疏批

卿立廟之時此地間僻今傍江修築舉國勝游與卿同之須避喧雜事資改作遂令官司承以拆除終須結構已有處分無假致辭

答侍中裴光庭等上尊號表批

卿等思致君堯舜欲加號聖文朕內省虛懷安敢當此又
太宗睿宗皆有聖謨纂承祖號安敢同稱幸體朕懷宜斷
來表

答再請上尊號表批

聖文之名稱號所極卿等致君堯舜亦宜導以冲撝超駕
前王彌增夕惕豈朕好譽之心內致自矜之色外形招此
假詞以相虛美靜思反照撫事求心詩云我心匪石不可
轉也幸悉所守即斷來章

答三請上尊號表批

金定合月三
惟聖與文洪名極稱內省虛缺安敢冒承匪石之心已具
前答方與卿等上調元氣下遂蒼生政削浮華化歸敦樸
升崇高之號去滿假之端勉建皇極以迎天祐悉此至言
宜斷來表

答李齊古石臺孝經表批

孝者德之本教之所由生也故親自訓注垂範將來今石
臺畢功亦卿之善職覽所進本深嘉用心

答顏真卿賀皇帝即位批

兇逆亂常侵侮中夏潼關失守京國不寧朕因涉岐梁至

於巴蜀遂命皇帝肇登寶厯爰靖妖氛今官軍益振回紇
効款即擬南行共爲翦滅卿忠惟奉國孝則保家懷不二
之心秉難奪之操皇帝累申寵命兼以崇班宜有懋於深
功一作官且用光於重守

營興慶宮德音

門下朕昔在藩國此維邸第乾坤未泰陰陽尚蒙則有神
物效靈祥符肇貺飛嘉氣於在田之際湧瑞池於或躍之
時惟此舊居式加新宇周牆僅板於百堵卑宮不階於三
尺棟梁之用毀撤所餘聊以紀天地之休徵貽子孫之儉

約耳屬春令變始時惟發生萬國來朝千官入賀旣稱觴以獻壽宜施惠以布德況農桑在候稼穡正興或幽彼圉圉獨隔陽和之澤或迫於徭役不遂農桑之務言及於此軫歎良深其徒已下罪且令責保其應當番兵丁匠等灼然單貧者所由勘會並放管農所在訴訟長官隨事疏理勿使冤滯非軍國所要餘不急之務一切並停仍加勸課循植農穡其河北水損戶旣屬春事慮有乏絕不支濟者宜委使與州縣相度量加賑恤諸處行人之家及鰥寡惻獨不能自存者州縣長官親加優撫使得存濟應有差科

量事矜放且宣風緝化職在令長有司銓藻之次特宜審
擇其才惟德與刑爲政之要頃無聞於風化多取威於櫓
楚理人之道其若是乎愚昧之流或輕抵犯宜加曉諭使
識章程其含生之類不敢輒有屠殺天下捕獵亦宜禁斷
仍嚴加捉搦百司各遵時令務宏寬大之典使政理無私
稱朕意焉